

第 33 回 世界漢詩同好會 (韓國) 參加詩

摠 16 人 19 首

<一> 秋日書懷

1. 作者：清溪 趙冕熙

風高雨霽水澄江，載酒遊人不繫艫。
鶴舞婆娑傍韻席，漁歌斷續繞篷窓。
果甘穀稔豐何洽，菊秀楓丹景自雙。
世界漢詩今幾次，同文爲契結千邦。

2. 作者：池 濬

春恨秋悲每自雙、一生心事苦盈腔。
從來雁影幾回照、無奈君家傍碧江。

3. 作者：虛亭 李漢元

玉露蛩聲雁落江，黃雲野景暎芸窓。
萬山染葉丹青繡，一水清光日月雙。
騷客晚秋尋酒肆，佳人深苑涉溪缸。
飛空候鳥書人字，蘆白湖邊夜繫艫。

4. 作者：石邨 李斗熙

數聲叫雁赴清江，香菊携來泛酒缸。
黃稻野邊豐稔滿，白蘋水上鷺飛雙。
涼窓蟲語喧隣壁，滴露金風渡石杠。
大選此時宜慎戒，甘言勿惑保吾邦。

5. 作者：趙英哲

時適清涼節，天高暑氣降。
讀書尋古典，仰叩聖賢窓。

6. 作者：柏村 權奇甲

追香野菊興無雙，伴鶴伴鷗山水邦。
恣意臨風歌一曲，論懷驅韻吐長江。
勸杯五柳黃花酒，歸臥三秋皓月窓。
自許桂華流入腹，天然清骨遺紛囂。

7. 作者：雲溪 趙昌來

西風擬棹漢詩江，問菊隨楓溯網窓。

思入煙波須妙手，筆驅蘆雁卻疑羣。
順流不勞魚龍動，強韻效能珠玉撞。
文士悲秋多感慨，瓊琚盈掬喜同腔。

8. 作者：葛亭 權宰興

蘇子昔遊赤壁江，誦詩明月酒盈缸。
金神得勢能無敵，炎帝依期自有降。
玉露下時蟲唧唧，商風吹處鐵鏗鏘。
醉翁嘗作秋聲賦，借問當宵幾挑釭。

9. 作者：省軒 朴海春

聳峙危峰欲墜江，碧空紅樹兩無雙。
小春韻致皆詩境，大地光風滿客窓。
醉後交情如許壯，興來筆力似將扛。
若爲吾契能忘私，世界何方不我邦。

10. 作者：一愚 李忠九

黃花重九酒盈缸，處處楓林錦繡邦。
攜手登高獻酬酌，吟詩唱和自成腔。

<二> 秋天望鄉

1. 作者：池濬

一雨消殘暑、陰蟲泣客窓。

忽看孤館月、應照故鄉江。

亂髮霜成半、愁心淚作雙。

中秋空計日、風葉影幢幢。

2. 作者：清溪 趙冕熙

燕雁離逢際，登高興滿腔。

蒼葭圍澤國，霜月照鄉邦。

砌上空鳴蟀，堂前悄臥烝。

鷗盟今已矣，達夜伴銀缸。

3 作者：兢齋 尹烈相

四季分明秀麗邦，望鄉絕景艷無雙。

稻光染畝粧黃野，楓色斑山照翠窓。

雁陣風寒離北塞，燕兒露冷越南江。

陶翁愛菊東籬發，與翰尊鱸挹酒缸。

4. 作者：霞山 李鍾福

天海無雲興滿腔，故山景色映秋江。

心躡嶺外遊鄉苑，身在城隅依客窓。

玉露霜楓裝畫壁，金風隊雁影渡缸。

夕陽恰似紅顏再，到老何愁白鬢雙。

5. 作者：雲溪 趙昌來

所居傍大江，秋色先書窓。

夜露傷原草，晨霜皓石缸。

黃稻香自聞，紫蟹味無雙。

不問淄塵事，浮浸老水邦。

6. 作者：建祐 趙溶熙

綠水青山好故邦，忘機鷗鷺自爲雙。

挺妍楓菊成生畫，不必圖書掛闥窓。

7. 作者：敬菴 朴容圭

寂寞京家詠漢江，故鄉念切倚南窓。
後園老樹棲雙鶴，籬落陽隅睡一尫。
黃菊幽香飛旅舍，丹楓秀色透心腔。
胸懷瑟瑟無情步，酒壓愁城我思降。

8. 作者：仁山 趙錫熙

戀懷兄弟登高處，獨插茱萸恨客窓。
落帽此時楓菊好，携醪團會欲傾缸。

9. 作者：一愚 李忠九

水光天接晚秋江，塞雁南飛各自雙。
遊子思鄉千里望，弟兄相憶月明窓。